

## Promocija knjige "Mine"

Autor Irma Alićajić

Subota, 03 Juli 2010 19:24 - Ažurirano Subota, 11 Septembar 2010 01:20

---



U **Domu kulture** općine Cazin, održana je promocija knjige, koja se po svojoj tematici može svrstati u sami vrh obavezne literature postratnog perioda našeg društva. Knjiga generala Fadila Hasanagića „Mine-prepreka razvoju **Bosne i Hercegovine**“ zasigurno govori o jednom od najbitnijih pitanja razvoja naše zemlje.

Kao pokrovitelj promocije prisutne je pozdravio i dobrodošlicu izrazio općinski načelnik **Nermin Ogršević**

. Prema njegovim riječima: "Ova knjiga nas podsjeća da su značajni resursi naše zemlje zarobljeni minama i minskim poljima i istovremeno nam daje informacije koje mogu biti od velike pomoći svima koji se stavljaju u funkciju rješavanja ovog problema. Mi ćemo i dalje podržavati ovakve i slične projekte s ciljem uklanjanja jedne od mnogobrojnih prepreka razvoju Bosne i Hercegovine."

O knjizi je govorio i jedan od pokrovitelja cjelokupnog projekta, gospodin Husein Huska Kličić, predsjednik Crvenog križa USK-a. "Crveni križ se bavi ovim problemom dugi niz godina i između ostalog vodi bazu podataka o žrtvama od mina kojih je danas ukupno 5.003 računajući od 1992.godine. Ovaj problem mora biti obaveza cjelokupnog našeg društva i čišćenje minskih polja jeste spor, skup i opasan proces i zato svaka pojedinačana i zajednička gesta na rješavanju ovog problema predstavlja duboko humano djelo za dobrobit svih nas", riječi su Huseina Kličića.

## Promocija knjige "Mine"

Autor Irma Alićajić

Subota, 03 Juli 2010 19:24 - Ažurirano Subota, 11 Septembar 2010 01:20

---

Kao promotori knjige o djelu su više rekli prof.dr. Sulejman Kendić i mr.sc. Mujo Begić, koji su se prije svega osvrnuli na imponantnu biografiju generala Hasanagića i njegovom kako naučnom, tako i vojnom pristupu obradi ove teme. "**General Hasanagić** se bavi pitanjem mina punih 40 godina i ovom knjigom ukazuje na sve aspekte tog problema i njegove konzekvence na stanovništvo i razvoj određenih područja", rekao je prof.dr. Sulejman Kendić.

Autor se zahvalio svima koji su podržali ovaj projekat i naglasio potrebu većeg angažmana državnih institucija u procesu razminiravanja BiH, posebno naseljenih područja. Prema statističkim podacima koji su navedeni u samoj knjizi, većina institucija u našoj zemlji ovom problemu ne pridaje dovoljno pažnje.